



Vigorus stattan ils musicants dalla Musica Greina/Vrin sin tribuna. Il concert festiv ei staus variants ed ha plaschiu al publicum.

FOTOS P. DUFF



Ils pli giuvens musicants han demussau plascher da sunar ed ein garants per la cuntinuaziun culturala egl avegnir.

# Giubileum dad in'uniun zun activa

Vrin ha fatg fiasta da 140 onns Musica Greina/Vrin

■ (anr/ff) **Tempra festiva ha regiu el vitg da Vrin duront prest in'jamna. L'activitad dalla Societad da musica Greina/Vrin cuoza gia dapi 140 onns. Ils avdents da Vrin ein loschs da saver mussar tgei tradiziun culturala ch'els possedan, co quella ei vegnida tgirada duront prest in tschentaner e miez e co ella vegn mantenida vinavon el futur. La voluntad dils muntagnards da schar viver tradiziun ella cultura han els presentau la dumengia vargada en halla dalla casa da scola dil vitg.** Gia all'entschatta dallas produziuns ein ils pli giuvens sepresentai al publicum ed han mussau lur habilitads musicalas. Quellas ein vegnidas promovidas e scoladas ella scola da musica. Cun quell'instituziun han ils scolars dad oz ina situaziun zun avantagiusa. En cum-

paregliazun stuevan ils musicants da pli baul anflar autras vias dad emprender il sunar instruments. Ils vegls devan lur savida vinavon als giuvens e lezs puspei s'engaschavan cun anim ell'uniun per contonscher enzacons bials muments duront igl onn, per embellir fiastas ecclesiasticas ni per purtar plascher als vischins dil vitg cun dar concerts ni produziuns specialas. Talas caussas ed aunc biaras anecdotes dapli ha *Gieri Antoni Caviezel* rimnau ord fatgs historics dalla musica da Vrin e scret quellas en ina cronica zun interessanta. El ha presentau il cuntegn ad in vast publicum interessau. En cavazzins d'ina registraziun fatga igl onn 1990 ha Caviezel dau il plaid ad enzacons dils pli vegls musicants d'antruras che han ofniau leghers schabetgs ord la hisotria da quell'uniun.

Els han raquintau da fiastas el vitg ed ordlunder, co els ein sestellegiai da rimnar daners per cumprar instruments ed era ch'els exercitavan seras en e seras ora en stanzas freidas, sclaridas cun cazzolas da petroli ni carbit. Biaras informaziuns sur da Vrin e l'entira cronica ein registradas sin in disc cumpact.

Cun slontsch e plascher ha il dirigent *Corsin Alig* tgamunau ses 16 musicants atras il concert. Melodias enconuschantas e plascheivlas han ils aspectaturs survegniu ad ureglia. Ils tocs sunai cun sentiment e dinamica ein stai bein eligi ed adattai per ina occasiun da tempra festiva. En rama dalla historia dalla Musica Greina/Vrin ein era ils veterans semess ellas retschas dils musicants actuals. Tgei plascher ch'els han demussau d'astgar prender puspei sin bucca il buch in e serar en bratsch ni maun igl instrument! Ed els han fatg buna paretta, secapescha cun in marsch ed el tact dil dirigent d'antruras *Linus Casanova*. *Andri Casanova* ha moderau a moda humoristica ed informativa il program festiv e las produziuns. Ils hospis dalla musica da corns Pèz Fess da Sevgein han dau in schatg ord lur repertori. Lur produziuns han plaschiu e demussau la qualitat musicala ch'ei drova per daventar campioni svizzer.

Quei ch'ei stau antruras ed ei oz ei damaun historia. Ils avdents da Vrin demuossan unitad e la voluntad da menar vinavon la tradiziun culturala. Era sch'els cunfins communal vegnan egl avegnir slargiai resta il coc dil vitg da Vrin ina unitad per sesezza cun habitonts dad atgna tempra e sentiment solidaric. Perquei vegn ins era egl avegnir ad udir dils da Vrin, da lur identitad e cultura singulara.



Il president, Armin Caviezel, drezza ils plaid d'engraziament als meriteivels commembers ed als gidonters dalla fiasta.



Dirigent Corsin Alig ha plascher da sia truppa da musicants che dumbra dapresent 16 actives.



Instruments historics ed uniformas da pli baul dalla musica dil vitg han era interessau als giuvens.



Ils musicants veterans ein semtgai per ina produziun. Alla bitgetta igl anteriur dirigent *Linus Casanova*. Al bariton il cronist *Gieri Antoni Caviezel* che ha presentau la historia dalla Musica Greina/Vrin. Sia cronica ei ligiada en brochura e registrada sin disc cumpact.

## Corin Curschellas e sia amur

■ (anr/sr) **Questa sera, ils 15 da matg allas 20.00 ha la prepremiera dil film «Corin Curschellas e sia amur per la chanzun rumantscha» liug el Cinema sil Plaz a Glion.** Il film dil cineast *Gieri Venzin* ei ina produziun da Monte Films ed RTR e portretescha la musicista, actura e poeta *Corin Curschellas*. La presentaziun el Cinema sil Plaz a Glion ei publica e gratuita ed alla fin dat ei la pusseivladad da s'entupar a caschun d'in apero. Dumengia proxima, ils 19 da matg vegn il film da Corin Curschellas emess allas 17.25 dalla televisiun sin SRF 1. Pil film che cuoza 25 minutas ha il regissur *Gieri Venzin* accumpignau la cantadura a concerts, observau ella en situaziuns dil mintgadi e schizun visitau ella al cuors da ro-



Questa sera ha la prepremiera dil film «Corin Curschellas e sia amur per la chanzun rumantscha» liug el Cinema sil Plaz a Glion.

MAD

montsch ch'ella ha frequentau la stad vargada. Sia amur pil romontsch ed oravontut per la chanzun romontscha ei admirabla e per dar nova veta e buca schar ir en emblidonna las veglias canzuns romontschas dedichescha ella bia da siu temps per dar nova veta a quella viarva.

En quei connex edescha la Chasa Editura Rumantscha in niev cudisch da canzuns. Il cudisch cul num «La Grischa» cumpara il zercladur e vegn completaus da dus discs cumpacts da Corin Curschellas ed explicaziuns dad *Iso Albin*. Il cudisch cuntegn 38 canzuns popularas romontschas en tut ils idioms. Ils texts dallas strofes ein per romontsch e tudestg ed era las explicaziuns dad *Iso Albin* ein bilinguas.

### ■ TIR

#### Success per Elena Tomaschett

(anr/hh) La tiradura sursilvana *Elena Tomaschett* da Rabiun ei stada la megliera Svizra alla concorrenza da tir da 10 meters dils juniors «Trophée des Cigognes» a Schwadernau. Al tir ein junioras e juniors dalla Frontscha, Belgia, Luxemburg e Svizra separticipai. Elena Tomaschett ha sittau in resultat da 179,7 puncts e ha aschia contonschiu il tierz rang final dallas junioras. Secunda megliera Svizra ei *Sina Jeger* da Meltingen stada sco quarta ed in resultat da 160,1 puncts. Ella qualificaziun era Elena Tomaschett daventada otgavla. Ella concorrenza dallas gruppas han las Svizras dominau sin l'entira lingia. Las duas gruppas ein seclassadas alla testa dalla rangaziun. Elena Tomaschett ha contonschiu cun sia gruppa il second plaz.